


# Азалда тақдир қилинган бўлса-да, ризқларни сабабларга боғлаш



18:21 / 18.10.2017 4468

Албатта, Аллоҳ ризқларни Лавҳда Ўзи иродада қилган миқдор, Ўзи иродада қилган кайфият ва Ўзи иродада қилган вақтга кўра битиб қўйган.

Нафс бир нарсани истайди ва ўша истак Лавҳда битилганга гоҳида мувофиқ бўлади, гоҳида мухолиф бўлади. Агар ушбу зикр қилинган сабаблар бўлмаса, албатта, нафснинг шаҳвати ғалаёнга тушар ва ўша битилган тақдирни яхши деб билишга қодир бўлмас эди. Шундай экан, бунда одамларнинг қалблари учун фасод бор. Шу нуқтаи назардан сабаблар одамларнинг эътиборини тақдирга битилган нарсадан талаб қилинадиган нарсаларга ва касбларга бурадиган қилиб қўйилган. Токи улар бу борада ўзларини маломат қилсинлар.

Аллоҳ таолонинг тақдирга битилган нарсаларга сабабларни боғлаб қўйиши ўлим фариштаси туфайли бўлган. У келиб, очиқчасига одамларнинг жонини олар, одамлар эса уни сўкишарди. Шунда у Аллоҳга шикоят қилган. Шундан сўнг дард ва касалликлар туширилган. Сабаблар касалликлар ўрнидадир. Ризқ эса ўлим ўрнида. Иккисининг бошланиши ҳам Аллоҳнинг хузуридандир.

Аллоҳ молниңг аҳамиятини ва унинг динга қувват эканини баён қилиб айтади:

**«...Аллоҳ сизларга (ҳаёт) тиргаги қилиб қўйган молларингизни эсипастларга берманг...»[\[1\]](#)**

## **РИЗҚ ТАЛАБ ҚИЛИШНИ ТАРК ЭТИШГА ҲУЖЖАТ ЙЎҚ**

Баъзилар: «Дин ишларига берилган айрим одамлар ризқ талабини тарк қилиб, «Ризқнинг кафолатини Аллоҳ Ўз зиммасига олгандир», дейишади».

Расулуллоҳ соллаллоҳу алайҳи васалламдан келган:

**«Албатта, ризқ бандани худди ажал унинг ортидан қувгандек қувади»[\[2\]](#).**

Аллоҳ таоло демиш:

**«...Ким Аллоҳга тақво қилса, унинг йўлини очиб қўюр. Ва унга ўзи ўйламаган тарафдан ризқ берур...»[\[3\]](#)**

**«Расулуллоҳ соллаллоҳу алайҳи васаллам: «Буни ол! Сен унга бормасанг, у сенга келади», деганлар»[\[4\]](#).**

Улар ўтириб олиб, ризққа ва кафилнинг бу борада уларга вафо қилишига интизор бўладилар.

**Шайх Муҳаммад Содик Муҳаммад Юсуф**

(Касбнинг баёни китобидан)

---

[1] Нисо сураси, 5-оят.

[2] Баззор, ИбнҲиббон, Байҳақий ва бошқалар ривоят қилишган.

[3] Талоқ сураси, 2-3-оятлар.

[4] Ибн Ҳиббон, Табароний, Байҳақий вабошқалар қилған ривоятда Набий соллаллоҳу алайҳи васаллам тушибқолған хурмони олиб, тиланчига узатиб, шу гапни айтганлар.